

ՑԱՐԱԿԱՆ ՌՈՒՍԱՍՏԱՆԻ ՌԱԶՄԱ-ՔԱՂԱՔԱԿԱՆ ՄԻՋՈՑԱՌՈՒՄՆԵՐԸ
ՄԵՐՉԱՎՈՐ ԱՐԵՎԵԼՔՈՒՄ 1914—1918 ԹԹ. ՊԱՏԵՐԱԶՄԻ ՆԱԽՈՐՅԱԿԻՆ

Ցարական կառավարության արտաքին քաղաքականության հիմնական ուղղություններից մեկը եղել է Միջին ու Մերձավոր արևելքում տարվող քաղաքականությունը։ Առաջին համաշխարհային պատերազմի նախօրյակին Մերձավոր ու Միջին արևելքի երկրների և Ռուսաստանի փոխհարաբերությունների ու կառավարության քաղաքականության մշակմանն ակտիվ կերպով մասնակցում էր նաև Կովկասի փոխարքան։ 1905 թ. հետո նիկոլայ II-ը հատուկ հրովարտակով զգալիորեն ընդլայնեց Կովկասի փոխարքայի լիազորություններն ու իրավունքները վարչական, տնտեսական և ռազմական հարցերի ընդգրկումով։ Փոխարքայի տնօրինությանն էր հանձնված Թիֆլիսի, Քութայիսի, Նիդավանդի, Երևանի, Բաքվի և սևծովյան նահանգները, Թերեքի, Կուրանի, Դաղստանի, Ղարսի և Բաթումի մարզերը, Զաքաթալայի ու Սուխումի օկրուգները։ Փոխարքան ուներ երկու հիմնական օգնականներ՝ քաղաքացիական պործերի և ռազմական գծով։ Փոխարքային կից գործում էր բարձրաստիճանի պաշտոնյաներից կազմված խորհուրդը (խորհրդակցական իրավունքով), իսկ ընթացիկ ղեկավարությունն իրականացնում էր իր դրասենյակի միջոցով։ Գրասենյակի ամենաազդեցիկ բաժիններից մեկը հատուկ բաժինն էր։ Վերջինս իրականացնում էր ոստիկանական, հետախուզական ֆունկցիաներ և իր օրգաններն ու գործակալներն ուներ բոլոր նահանգներում, մարզերում, օկրուգներում, գավառներում, քաղաքներում, ինչպես նաև սահմանակից պետություններում։

Հետաքրքիրն այն է, որ Կովկասի փոխարքան իր հատուկ տեղական ունեի Պետրոգրադում, որը Կովկասին վերաբերող բոլոր գործերով մշտապես շփման ու բանակցությունների մեջ էր մտնում պետական կառավարման կենտրոնական օրգանների հետ։ Նա ենթարկվում էր փոխարքային և առանց վերջինիս լիազորության իրավունք չունեի սկզբունքային նշանակություն ունեցող հարցերի մասին որոշումներ ընդունելու։ Պատերազմի նախօրյակին այդ պաշտոնը վարում էր պետական խորհրդի անդամ սենատոր Նիկոլսկին։ Ինքը՝ փոխարքան նույնպես պետական խորհրդի անդամ էր։

Մյուս կարևոր բաժինը, որ գործում էր փոխարքային կից, դա արտաքին գործերի մինիստրության ներկայացուցչությունն էր։ Հաշվի առնելով կայսրության լինդարձակությունը, Կովկասի սահմանակից լինելը Թուրքիային ու Պարսկաստանին և վերջինների վճռական դերը Մերձավոր արևելքի երկրների քաղաքական-ռազմական կյանքում, ցարը և նրա պետական կենտրոնական ղեկավար շրջանները լուրջ պարտականություններ էին դրել Կովկասյան փո-

¹ Ерошкин Н. П., История государственных учреждений России до Великой октябрьской революции, Москва, 1958, стр. 53—56.

խարքայության վրա՝ ինֆորմացիայի կենտրոնացման և համապատասխան միջոցառումների ու առաջարկների մշակման ասպարեզում:

1905 թ. Կովկասի փոխարքա է նշանակվում արքունիքի մինիստր դուքս, զեներալ Վորոնցով-Դաշկովը: Վերջինս եկել էր փոխարինելու Գալիցինին, որն իր դաժանություններով, բիրտ մեծապետական շովինիստական քաղաքականությամբ անփառունակ անուն էր վաստակել կովկասյան ժողովուրդների և հատկապես հայերի շրջանում: Վորոնցով-Դաշկովը ցարի հավատարիմ և նրան անսահման նվիրված, ռազմական բուռն իրադարձություններում և արքունի խժոժություններում մեծ փորձ ձեռք բերած պետական գործիչներից էր, օժտված զիմնագիտական և քաղաքական նուրբ հոստաություններով: Նա Կովկասի փոխարքա մնաց մինչև 1915 թ. օգոստոսը, երբ նիկոլայ II-ը, իր ձեռքը վերցնելով երկրի գլխավոր ուժերի Գերագույն ղլխավոր հրամանատարի պաշտոնը, նիկոլայ Նիկոլաևիչ Ռումանովին նշանակեց Կովկասի փոխարքա: Այսպիսով, Վորոնցով-Դաշկովը Կովկասը կառավարեց 10 տարի: Նա իրականացրեց երկրամասի հեղափոխական շարժումների ձեռնմարտ և «հանգստության» վերականգնումը, նախապատրաստեց կովկասյան զորքերը առաջիկա համաշխարհային պատերազմին, շուրջ 10 ամիս (1914 թ. հոկտ.—1915 թ. օգոստոս) ղեկավարեց բանակն ու երկրամասը Թուրքիայի դեմ մղած պատերազմում և զրանով էլ ավարտեց իր պետական-ռազմական կարիերան:

Սույն հոդվածում կանգ կառնենք Վորոնցով-Դաշկովի պետական-ռազմական-գիմնագիտական գործունեության երկու հարցերի վրա:

1. ԴԱՋՄԱԿԱՆ ԹԱՏԵՐԱՔԻՄԻ ՆԱԽԱՊԱՏՐԱՍՏՈՒՄԸ

Հայտնի է, որ մեծ տերությունները ղեկեւ խաղաղ ժամանակ բազմակողմանիորեն նախապատրաստվում են պատերազմի, այն է՝ մշակում են մոբիլիզացիոն պլաններ, կատարում գլխավոր ուժերի խմբավորումների տեղաբաշխում, փոխադրամիջոցների հարմարեցում՝ պատերազմի ու բանակի շահերին, մատակարարման ապահովում և այլն, կառուցվում են ամրություններ, բերդեր, ելման դիրքեր և ճանապարհներ: Սկսած XIX դարի վերջերից և XX դարի սկզբից երկաթուղային ճանապարհների կառուցումը բոլոր մեծ պետությունների արտաքին ու ներքին քաղաքականության ոլորտում զրավում էր ամենսառաջնակարգ տեղերից մեկը: Ցարական կառավարությունը բացառություն չէր կազմում: Այն բանից հետո, երբ ավարտվեց Պետերբուրգ-Վլադիվոստոկ երկաթգծի կառուցումը, ցարական ղեկավար շրջանները մտահոգված էին նոր երկաթուղիների կառուցումով արևմուտքում և հարավում: Գերագույն շտաբը հիմքեր ուներ անհանգստանալու, քանի որ պատերազմ հայտարարելու դեպքում Գերմանիան հնարավորություն ուներ ավելի շուտ իր զորքերը ռազմաբեմ փոխադրել, քան Ռուսաստանը: Առավել հիմքեր կար անհանգստանալու մերձավոր արևելքում Գերմանիայի, Ֆրանսիայի ու Անգլիայի կողմից տենդագին թափով ծավալված ստրատեգիական նշանակություն ունեցող երկաթուղային գծեր կառուցելու պլաններից:

Անհանգստանում էր նաև Վորոնցով-Դաշկովը: Կայսրության կենտրոնական մարզերի հետ Կովկասը կապված էր միայն մեկ երկաթգծով՝ Ռոստով — Մախաչկալա — Բաքու — Թիֆլիս — Երևան: Հնարավոր բարդությունների դեպքում, այն է՝ Պարսկաստանի կամ Թուրքիայի հետ ռազմական ընդհարում —

ների ժամանակ այդ գիծը կարող էր վտանգի ենթարկվել դրանից բխող իր ծանր հետևանքներով:

Անդրկովկասի տերիտորիայում պատերազմի նախօրյակին գործում էին հետևյալ երկաթուղային գծերը՝ Բաքու—Թիֆլիս, (կառուցվել է 1872—1883 թթ.), Թիֆլիս—Ալեքսանդրապոլ—Կարս (կառուցվել է 1896—1899 թթ.), Ալեքսանդրապոլ—Երևան (կառուցվել է 1899—1901 թթ.)² և մի շարք այլ գծեր, գլխավորապես Արևմտյան Վրաստանում:

Պատերազմի նախօրյակին ցարական կառավարության ու գերագույն շտաբի հոգսերից մեկը Կովկասում ստրատեգիական նշանակություն ունեցող երկաթգծի կառուցումն էր. գոյություն ուներ երկու կարծիք: Պետական խորհուրդը և անձամբ Ստոլիպինը նպատակահարմար էին գտնում նոր երկաթգիծը կառուցել Սև ծովի ափերով (Տուապսե—Սուխումի, այսպես Սուխումի—Թիֆլիս): Կովկասի փոխարքան հիմնավորում էր Վլադիկավկազ—Թիֆլիս (Ռազմավի-րական ճանապարհին զուգընթաց) գծի բացարձակ առավելությունը ծովափնյա գծի համեմատությամբ: Իր փաստարկումները Վորոնցով-Դաշկովը առավել հստակությամբ ձևակերպել է 1911 թ. հունվարի 26-ին Նիկոլայ II կայսրին գրած նամակում³:

Իր նամակի սկզբում փոխարքան գրում է, որ 1908 թ. հոկտեմբերի 6-ին Մինիստրների կաբինետը Կովկասում Ռուսաստանի ստրատեգիական դրու-թյան բարելավման հարցը քննելու ժամանակ «սկզբունքորեն անհրաժեշտ է համարել արագորեն կառուցելու երկաթգիծ Սև ծովի ափերով»:

Նման որոշումը հիմնավորվել է նրանով, որ ծովափնյա ճանապարհը կարելի է կառուցել 5 տարում, այն ժամանակ, երբ Կովկասյան գլխավոր լեռ-նաշղթայի լեռնանցքով երկաթգիծ կառուցելը կտևի ոչ պակաս 10—12 տարի⁴: Կովկասի, որպես Ռուսաստանի մերձավոր արևելյան քաղաքականության իրա-կանացման ճանապարհին բնական ամենահիմնական ու հարմար բաղադրիչ, ստրատեգիական դրության բարելավումը, ըստ Վորոնցով-Դաշկովի, պահան-ջում է առաջին հերթին կառուցել լեռնանցքային ճանապարհը և հետո՝ ծո-վափնյան: Ահա փոխարքայի փաստարկումները.

1) Ռուսաստանի սևծովյան նավատորմը համեմատաբար թույլ է և պատե-րազմի դեպքում կովկասյան օկրուգը ստիպված պիտի լինի լրացուցիչ զորք առանձնացնել ծովափնյա երկաթգծի պահպանման համար: Թուրքիան, իսկ առավել ևս նրա դաշնակիցները միշտ կարող են իրենց ռազմածովային նավա-տորմի հրետանու կրակով ոչնչացնել երկաթուղային կամուրջները, ղեկավար հանել ծովափ և «այսպիսի պայմաններում սևծովյան երկաթգծի ստրատեգիա-կան նշանակությունը համասարվում է զերոյի»⁵:

Հաշվի առնելով Թուրքիայի ագրեսիվ գործողությունները իրանական Ադրը-բեջանում, չպետք է բացառված համարել, որ Ռուսաստանի հետ ռազմական

² А. Т. Сагратян. История железных дорог Закавказья (1856—1956 гг.), էջ 541—543 (ձեռագիր):

³ Ինչպես այդ, նույնպես և մի շարք այլ կարևոր նամակներ, որ գրել է Վորոնցով-Դաշկովը կայսր Նիկոլայ II-ին, առաջին անգամ հրատարակվել են «Красный Архив»-ի 1928 թ. 1-ին (26) հատորում, էջ 96—126, իսկականները պահվում են— Центральный Госархив Октябрь-ской революции—высших органов государственной власти и органов государственного управления СССР. ф. 601, оп. 1, д. 1210.

⁴ «Красный Архив», т. I (XXVI), 1928, стр. 113.

⁵ «Красный Архив», указан. том, стр. 113.

ընդհարում սկսելու դեպքում նա կարող է շարժվել դեպի Անդրկովկասի խորքը, մասնավորապես Բաքու և կտրել Թիֆլիս—Բալաջար—Բեսլան գիծը, ուստի Կովկասը վտանգից փրկելու միակ ելքը լեռնանցքային երկաթգծի կառուցումն է՝ Վլադիկավկազ—Թիֆլիս⁶։

2) Լեռնանցքային ճանապարհն ավելի կարճ է, անցնում է ավելի վստահելի բնակչություն ունեցող վայրերով և շատ փոքրաթիվ ստորաբաժանումներով հնարավոր է կազմակերպել նրա պաշտպանությունը։

3) Վլադիկավկազ—Թիֆլիս երկաթգիծը մոտ 800 կիլոմետրով կկրճատի Ռուսաստանի և Անդրկովկասի միջև եղած հաղորդակցության միակ ճանապարհը և զգալիորեն կնպաստի Թուրքիայի ու Պարսկաստանի հետ Ռուսաստանի առևտրի ծավալմանը։ Այդ տեսակետից, ըստ Վորոնցով-Դաշկովի, սևծովյան երկաթգծի նշանակությունը շատ չնչին է։ Չնայած Սև ծովի ափերը հիանալի հանգստավայրեր են, սակայն, ըստ Կովկասի փոխարքայի, «նման հանգամանքը չպետք է լուրջ ուշադրության արժանանա պետական կարևոր նշանակություն ունեցող ճանապարհի կառուցման ժամանակ»⁷։

4) Միևիստրների կարիներում հարցը քննելու ժամանակ հաշվի են առել, որ լեռնանցքային ճանապարհի կառուցման ժամանակ հարկ կլինի 20 կմ թունել փորել, որը կտևի 10—12 տարի։ Վորոնցով-Դաշկովը գտնում է, որ 1911 թ. տեխնիկայի պայմաններում այդ ժամկետը կարելի է կրճատել 6—7 տարով⁸։

5) Վերջին հաշվով լեռնանցքային ճանապարհի կառուցումն ավելի էժան կնստի, քան թե Սամտրեդիեց Թիֆլիս, չնայած տվյալներ չի բերում նման թեղի հիմնավորման համար։

Իր նամակի վերջում Վորոնցով-Դաշկովը վճռականորեն նշում է, որ «անդամ ավելի լավ է 10—12 տարուց հետո ունենալ լեռնանցքային գիծը, որը կրավարարի Կովկասի բոլոր պահանջներն ու կարիքները ստրատեգիական, քաղաքական և տնտեսական տեսակետից, քան թե 5 տարուց հետո ունենալ սևծովյան ճանապարհը»⁹, որը վերը նշած պահանջները չի բավարարի և կուենենա չնչին նշանակություն։

Չնայած Վորոնցով-Դաշկովի ուժեղ փաստարկումներին, Պետրոգրադում նրա առաջարկությանը չընդառաջեցին։ Այս հարցում որոշակի դեր էին խաղում այնպիսի սուբյեկտիվ հանգամանքներ, ինչպես Ստոլիպինի, Սուխոմլինովի, Յանուշկևիչի և այլ ազդեցիկ գործիչների անբարյալ կամ վերաբերմունքը դեպի Վորոնցով-Դաշկովի անձը։

Մերձավոր արևելքում օրըստօրե սրվող քաղաքական բարդ վիճակը ստիպում էր Կովկասի փորձառու փոխարքային մի անգամ ևս նիկոլայ II-ի առջև վճռականորեն առաջ քաշել ստրատեգիական նշանակություն ունեցող այս հարցը, սակայն այս անգամ խոսքը արդեն վերաբերում էր ավելի մեծ նշանակություն ունեցող երկաթգծի, քան լեռնանցքայինն էր, այն է տրանս-հնդկական կամ տրանս-պարսկական գծի կառուցմանը։ Այստեղ խոսքը վերաբերում էր Սուեզի ջրանցքը կառուցող ինժեներներ Շարլ Կոտարդի և Ֆերդինանդ ԼԷսկասի նախագծերին, որոնք դեռ 1878 թ. Կոստանդնուպոլսի ռուսական դեսպան Իդնատևի միջոցով միջնորդել էին ցարի առաջ կառուցելու «Կենտրոնա-

⁶ Նույն տեղում, էջ 114։

⁷ Նույն տեղում, էջ 115։

⁸ Նույն տեղում։

⁹ Նույն տեղում։

կան Ասիական մեծ ճանապարհը», որը Եվրոպայի կամիացնի Ասիայի հետ Լստ նրանց հաշվարկումների, Կալեից (Համանշի ափին) Օրենբուրգ տարածությունը կազմում էր 4430 վերստ (որն արդեն կառուցված էր), Օրենբուրգից—Սամար-դանդ 2230 վերստ (որը պիտի կառուցվեր), Սամարդանդից—Ֆեշավեր՝ 1275 վերստ (նույնպես նոր պիտի կառուցվեր), Ֆեշավերից—Կալկաթա—Բոմբեյ՝ 3220 վերստ (արդեն կառուցված էր)։ Այսպիսով, Կալեից—Կալկաթա (Օրեն-բուրգի վրայով) 11155 վերստ է, որից 8160 վերստն արդեն կառուցված է, իսկ 3740 վերստը պիտի նոր կառուցվեր¹⁰։ Այնպես որ II կայսրը դրականո-րեն արձագանքեց այդ առաջարկին և որոշակի քայլերի դիմեց նախագծման աշխատանքների ուղղությամբ։ Հետագայում անհրաժեշտ համարվեց դեպի Հնդկաստանի արևմտյան սահմանը երկաթուղային զիծր կառուցել Պարսկաս-տանի տերիտորիայի վրայով, չնայած դրան վճռականորեն դեմ էր Անգլիան։ Ռուսական պետական ղեկավար շրջաններում այդ պատկերացում էր հետե-վյալ կերպ.

Ալիաթ՝—Թեհրան—Իսպահան—Բուլիր՝	2145 վերստ։
Ալիաթ—Թեհրան—Շիրազ—Բենդեր—Արաս՝	2186 վերստ։
Ալիաթ—Թեհրան—Ինդդ—Քերման—Չարար՝	2290 վերստ։

Եթե այդ իրականացվեր, Ռուսաստանը ձեռք կբերեր բացարձակ ազդեցու-թյուն Պարսկաստանում, դուրս կգար Հնդկաստանի արևմտյան սահմանը և Անգլիայի դեմ կշեղծությունը։ Դուրս Ա. Յու. Վիտտեն կողմնակից էր այդ նա-խագծին, Լստ նրա արտահայտություն՝ Պարսկաստանի հյուսիսը վաղ թե ուշ պետք է զբաղնա ռուսական պետության ծայրամասերից մեկը¹², իսկ երկա-թուղու կառուցումը մեծ չափով կնպաստեր դրան։

1911 թ. փետրվարի 7-ին Վորոնցով-Դաշկովը նիկոլայ I1-ին գրած նա-մակում հանդամանորեն նորից կանգ է առնում տրանս-պարսկական երկաթ-գծի կառուցման տնտեսական, քաղաքական ու ռազմա-ստրատեգիական նշա-նակության վրա։ Դեռևս արքունի մինիստր եղած ժամանակ նա մոտիկից ծա-նոթ էր այս հարցին։ Այդ գծի պետական նշանակությունը արտահայտվում է նրանում, որ ռուսական ճանապարհները «ներգրավվում են համաշխարհային տրանզիտին և Մերձավոր արևելքում Ռուսաստանի համար գերակշռող դիրքի հաստատմանը»¹³։ Նման ձևերով հաջողության դեպքում Բաղդադի եր-կաթգծի ստրատեգիական նշանակությունը զգալիորեն կթուլանար։

Ինչ վերաբերում է տրանս-պարսկական գծի տնտեսական, առևտրական նշանակությանը, ըստ Դաշկովի, այստեղ նույնիսկ վիճելու հարկ չկա։ Վոլգայի վրայով դեպի Կասպից ծովը, ապա Պարսկաստանի հյուսիսը մեծ հեռանկարներ են բացում Ռուսաստանի առևտրի համար բուն Պարսկաստանում։

Այդ նույն նամակում Կուլկասի փոխարքան կրկին անդրադառնում է լեռ-նանցքային երկաթգծի նախագծին և հիշեցնում ցարին, որ մի կողմից Վլա-դիկավկադ—Թիֆլիս, Թիֆլիս—Աստրա և մյուս կողմից, Բեսլան—Բալաչար—Աստրա կառուցվող երկաթգծերի շնորհիվ Անդրկովկասի ներքին հաղորդակ-ցության միջոցները զգալիորեն կբարելավվեն, որը տնտեսական նշանակու-

¹⁰ М. Павлов, «Империализм и борьба за великие железнодорожные и мор-ские пути будущего», Ленинград, 1925, стр. 122.

¹¹ Կայսրան՝ Եվախի և Թալի գծի վրա։

¹² Տե՛ս С. Ю. Витте, Воспоминания, т. 3, стр. 464.

¹³ «Красный Архив», т. 1 (XXVI), 1928, стр. 118.

թյունից բացի, կունենա նաև քաղաքական, ստրատեգիական նշանակություն: Առաջին համաշխուրհային պատերազմի փորձը ցույց տվեց, որ ստրատեգիական նշանակություն ունեցող երկաթուղիների կառուցման իր մտահղացումներում Վորոնցով-Դաշկովը հիմնականում ձիշտ էր: Հայտնի է, որ հենց պատերազմի տարիներին ստիպված եղան կառուցելու Զուլֆա—Թավրիզ (147 կմ, 1917 թ.), Սոֆյան—Շերափխանա (53 կմ, 1916 թ.), Սարիղսամիշ—էրզրում (170 կմ, 1916 թ.), էրզրում—Մամախաթուն (100 կմ, 1916 թ.) երկաթգծերը, որոնք զգալիորեն հեշտացրին Կովկասյան բանակի մատակարարման գործը: Հասկանալի է, թե որքան հեշտ կլինեին գեներալ Բարաթովի էքսպեդիցիոն հեծյալ կորպուսի մատակարարման և փոխադրումների հետ կապված հարցերի որոշումը 1915—1917 թթ. եթե այդ ժամանակ տրանս-պարսկական երկաթգիծը պատրաստ լիներ:

Մի շարք փաստեր խոսում են այն մասին, որ իր գործունեության ընթացքում Վորոնցով-Դաշկովը հատուկ ուշադրություն էր դարձնում առհասարակ ճանապարհաշինարարության հարցերին, շատ դեպքերում առավել կարևոր սեղանաքանդի համար որպես բանվորական ուժ նույնիսկ առանձնացնելով դորամուսերը:

Այդ միջոցառումների պատճառն ամենից առաջ փոխարքայի անհանգստությունն էր Թուրքիայի պատերազմական նախապատրաստությունների ակտիվացման կապակցությամբ: Ի տարբերություն որոշ պետական գործիչների, Վորոնցով-Դաշկովը համոզված էր, որ Թուրքիան Գերմանիայի հովանավորությանը տենդագին պատրաստություններ է տեսնում և նպաստավոր վայրկյանի սպասում Ռուսաստանի վրա հարձակվելու համար: Ռազմական թատերաբեմի ստրատեգիական նախապատրաստման կարևոր միջոցառումներից մեկը նա տեսնում էր հաղորդակցության ճանապարհների և առաջին հերթին երկաթուղային կարևոր գծերի կառուցման մեջ: Սակայն ոչ պակաս, իսկ գուցե և վճռական նշանակություն ունեցող հարցը մնում էր Կովկասյան ռազմական օկրուգի զորքերի ուժեղացումն ու նրանց օպերատիվ-տակտիկական նախապատրաստությունները, որոնց համար ամենայն հետևողականությամբ պայքարում էր Վորոնցով-Դաշկովը:

2. ՎՈՐՈՆՑՈՎ-ԴԱՇԿՈՎԻ ՁԵՆՈՒՑԱԳԵՐԸ ԹՈՒՐԹԻԱՅԻ ՌԱԶՄԱԿԱՆ

ՆԱԽԱՊԱՏՐԱՍՏՈՒԹՅՈՒՆՆԵՐԻ ՄԱՍԻՆ

Վորոնցով-Դաշկովը զգալիորեն բարելավել էր ռազմական և դիվանագիտական հետախույզության գրվածքը իր շտաբում, և դա հնարավորություն էր տալիս նրան ձիշտ կողմնորոշվելու ռազմական շինարարության ու արտաքին քաղաքականության հարցերում:

Նրա ուշադրությունից չվրիպեց ամենից առաջ 1909—1914 թթ. Թուրքիայից ղեկավարվող պանիսլամիզմի գործակալների գործունեությունը: Որպես քաղաքագետ նա լավ էր հասկանում, որ խոսքը վերաբերում է ոչ թե սոսկ կրոնական քարոզներին, այլ կրոնական երանգի տակ թաքնված ազդեցիկ գաղափարախոսության ինտենսիվ ծավալմանը Ռուսաստանում: Հենց նման ձիշտ կողմնորոշման հետևանքով էր, որ նա կարողացավ ժամանակին ձեռք առնել մի շարք վճռական միջոցներ պանիսլամիզմի գործակալներին որսալու և անվնաս դարձնելու գործում:

Որ պանիսլամիզմի գործակալները լուրջ վտանգ էին ստեղծել կայսրության տնտեսականության համար, երևում է 1908—1914 թթ., մասամբ էլ պատերազմի տարիներին, Կովկասում և առհասարակ ռուսական կայսրության մահմեդական ժողովրդով բնակեցված վայրերում գաղտնի կամ բացարձակ կերպով դործող Թուրքիայից կամ Պարսկաստանից ուղարկած պանիսլամական ագիտատորների, ծվարված սպանների, պետական ծառայողների, առևտրականների, ժուռնալիստների և մոլլաների հակառուսական գործունեությունից: Բաքվում, Թիֆլիսում, Բաթումում, Երևանում, Նախիջևանում, Մախաչկալայում, Կադանում, Ղրիմում և այլուր նրանց գործակալները տարածում էին կոշեր, թերթեր, գրականություն, որոնցում քարոզվում էին ողջ մահմեդական աշխարհի ու մահմեդական ժողովուրդների միավորման անհրաժեշտությունը Ռուսաստանի ու Անգլիայի դեմ պայքարելու գործում: Գաղտնի ոստիկանության օրգանները նրանց հարյուրներով ձերբակալում և բանտ էին նստեցնում կամ կիրառում էին վարչական ներգործունեության այլ միջոցներ:

1911 թ. սեպտեմբերի 5-ին փոխարքայության կողմից Կովկասի քաղաքական վիճակի մասին կազմած ընդհանուր ղեկուցագրի մեջ Վորոնցով-Պաշկովը ու նրա օգնականները Կովկասին սպառնացող վտանգը տեսնում են ոչ թե սոցիալ-դեմոկրատական հեղափոխական շարժումների՝ այլ պանիսլամիզմի դործակալների գործունեության մեջ: Կսահմանափակվենք միայն մեկ մեջբերումով այդ ընդարձակ ղեկուցագրից. «...ընթացիկ կես տարում սկսում է իրեն զգացնել տալ քաղաքական նոր հոսանք՝ այլազգիների մեջ պանիսլամիզմի ուսմունքը: Պանիսլամիզմի ուսմունքի ակտիվ քարոզիչների գործունեությունը Անդրկովկասի մուսուլմանական բնակչության մեջ զլխավորապես արտահայտվել է երկրամասի տարբեր վայրերը էմիսարներ ուղարկելով, որոնք շրջագայելով վաճառականների կամ Մեքքայի առաքյալների անվան տակ տեղական մուսուլմանների միջև քարոզ են կարգում հանուն մուսուլմանական աշխարհի միասնության: Հաշվի առնելով երկրամասի մահմեդական ազդաբնակչության հսկայական քանակը, պանիսլամիզմի ուսմունքը անկասկած քաղաքական լուրջ վտանգ է ներկայացնում Ռուսաստանի համար, մանավանդ, որ նա գալիս է մեզ մոտ Թուրքիայից և սերտորեն կապված է երիտասարդ թուրքերի շարժման հաջողությունների հետ Օսմանյան կայսրության մեջ: Ռուսաստանի նկատմամբ կրելով ազդեցիկ բնույթ, այդ ուսմունքը լայն տարածում ստանալով մեր տերիտորիայում և ռուսական մուսուլմանների համակրանքը ուղղելով Թուրքիայի կողմը, կարող է ստեղծել դժվարություններ Թուրքիայի հետ ռազմական ընդհարում սկսելու դեպքում, ավելի լուրջ դժվարություններ, քան այն, որ կրել է Ռուսաստանը Կովկասյան ճակատում 1877—1878 թթ. կամպանիայի ժամանակ Դադստանի լեռնականների ապստամբության հետևանքով»¹⁴: Ղեկուցագրում հիշատակվում է մի շարք թերթերի տնուններ, որոնք այս կամ այն չափով քարոզում են պանիսլամիզմ, ինչպես, օրինակ՝ «Ենի-խագիգատ», «Սադա», ժուռնալ «Ենի-Փեյուղաթ», «Շեխարի Սադիֆ» և ուրիշներ¹⁵: Այդ պրոպագանդայի հիմքում դրված է Մարոկկոյի,

¹⁴ Այդ բոլորի մասին հարուստ փաստացի նյութերի ու վավերագրերի հետ կարելի է ծանոթանալ Վրացական Սոժ պետական կենտրոնական արխիվի ֆ. 13, ցուց. 27, դ. դ. 1847, 3265, 3602, ֆ. 157, ց. 1, դ. դ. 1847, 211, 261, 312, ֆ. 10, ց. 1, դ. 312, ֆ. 4, դ. 57 և այլն:

¹⁵ ИГЛ Грыз. ССР, ф. 13, оп. 27, д. 1847, л. 3.

¹⁶ ИГЛ Грыз. ССР, ф. 157, оп. 1, д. 211, л. 20—21.

Թունիսի, Եգիպտոսի, Միջին Ասիայի, Հնդկաստանի, Թուրքեստանի, Դաղըստանի և Անդրկովկասի մուսուլմանաբնակ վայրերի միավորման հարցը հղորմամբ հեղական կայսրության սահմաններում:

Ռուսաստանի արտաքին գործերի մինիստր Ս. Դ. Սազոնովը 1912 թ. պաշտոնական այցով գտնվելով Բեռլինում, ստիպված էր Վիլհելմ II կայսրին և կանցլեր Բետման-Հոլվեգին ամենայն լրջությամբ հիշեցնել, որ Գերմանիայի կողմից հովանավորվող պանիսլամիզմի գաղափարախոսությունը լուրջ վտանգ է ներկայացնում Ռուսաստանի համար: Նիկոլայ II-ին ներկայացրած իր զեկուցագրում Սազոնովը գրում է. «Իմ վրույցի առավել հետաքրքիր մասը կայսրի հետ եղել է մտքերի փոխանակությունը պանիսլամիզմի և գերմանական ռազմածովային ուժերի զարգացման հարցերի շուրջը: Ամենից առաջ ես ձգտել եմ նորի՝ մեծության ուղադրությունը հրավիրել Ռուսաստանի շահերի տեսակետից վտանգավոր պանիսլամիզմի պրոպագանդայի տարածումը, որ պալիս է Կոստանդնուպոլսից...»¹⁷:

Սազոնովը պարզաբանում է Վիլհելմ II-ին, որ ռուսական կառավարությունն իր անհանգստությունը չէր արտահայտի, եթե պանիսլամիզմը կրեր իրոք միայն կրոնական բնույթ, սակայն նրա ազդեցիկ ուղղությունը միանգամայն ակնհայտ է: Վիլհելմ II-ը հեզանքով բացառում է իր կառավարության մասնակցությունն այդ գործում: Միևնույն ժամանակ խոստանում է բարյացակամ լինել դեպի իր «բարեկամ» Նիկոլայ II-ը¹⁸:

Որ Սազոնովը և Վորոնցով-Դաշկովը այդ հարցերում ցուցաբերում էին ռեալիստական մոտեցում և ճիշտ կողմնորոշում, այդ փայլուն կերպով ապացուցվեց պատերազմի տարիներին, երբ 1914 թ. դեկտեմբերին, Սարիղամիշի ռակատասարտի կրիտիկական օրերին պանիսլամիստների հաղարավոր կոչերը ողողեցին Անդրկովկասը, որոնք բորբոքում էին ֆանատիզմ, մութ կրքեր դեպի Ռուսաստանը և ռուսները: «Ապստամբվեցեք, մուսուլմաններ, ապրստամբվեցեք, սպանեցեք նրանց (ռուսներին՝ գյավուրներին—Ա. Հ.), քանի որ աստված ինքն է նրանց պատժում ձեր ձեռքերով»¹⁹,—կարգում ենք այս կոչերից մեկում:

Սույն հոգվածի նպատակից դուրս է հանգամանորեն բաղահայտելու սլանիսլամիզմի էությունը, նրա գործակալների գործունեության ձախողման պատճառները և առհասարակ պանիսլամիզմի վտանգը նաև մեր օրերում: Ընդգծենք, միայն, որ Կովկասի փոխարքա Վորոնցով-Դաշկովը իր քաղաքական ստրատեգիայում իրավացիորեն պանիսլամիզմը դիտում էր որպիս կայսրության շահերին սպառնացող վտանգ և կանխատեսում այն լուրջ ղժվարությունները, որ կարող է ստեղծվել Մերձավոր արևելքում, մասնավորապես Թուրքիայի հետ ռազմական ընդհարման մեջ մտնելու դեպքում: Այս տեսակետից պատմականորեն արդարացվում են այն բոլոր միջոցառումները, որ գործադրվել է փոխարքայության կողմից պանիսլամիզմի դեմ մղվող պայքարում, որը և բացառել է հատուկ «5-րդ շարասյան» վտանգը 1914—1917 թթ. Կովկասյան ռազմաճակատում:

Իրբ առկա են հաղթանակն ապահովող նյութատեխնիկական և քաղաքական-քարոյական գործոնները, պետական և ռազմական գործիչները իրավա-

¹⁷ «Красный Архив», том III. 1923 г., стр. 1920.

¹⁸ Նույն տեղում:

¹⁹ ИГА Грy: ССР, ф. 13, оп. 27, д. 3602, л. 110.

ցիորեն իրենց հիմնական ուշադրությունը կենտրոնացնում են բանակի մարտունակության բարձրացման վրա:

Ուսումնասիրությունները ցույց են տալիս, որ առաջին համաշխարհային պատերազմի նախօրյակին ռուսական կովկասյան զորքերի հրամանատարությունը ճիշտ է գնահատել ռազմաքաղաքական իրադրությունը, հետևապես և գործել է նպատակասլաց, զերծ մնալով լուրջ անակնկալներից: Այդ ամենից առաջ արտահայտվել է նրանով, որ Վորոնցով-Դաշկովը սխտեմատիկ կերպով կայսրին ու գերագույն շտաբին հաղորդել է Թուրքիայի ռազմական նախապատրաստությունների մասին և համառորեն պահանջել է ուժեղացնել կովկասյան ռազմական օկրուգի զորքերի թիվն ու նրանց զինվածությունը: Կանգ առնենք առավել կարևոր մի բանի փաստերի վրա, որոնք կհաստատեն նման գնահատականը:

1908 թ. հունվարի 5-ին Նիկոլայ II-ին գրած իր ղեկուցադրում Վորոնցով-Դաշկովը հանգում է այն եզրակացության, որ տվյալ ժամանակաշրջանում Ռուսաստանին ձեռնտու չէ որևէ բարդության ստեղծումը Թուրքիայի կամ որևէ այլ տերության հետ, սակայն միևնույն ժամանակ նա չի կարող չնշել, որ Թուրքիան ինքը տենդագին պատրաստություններ է տեսնում Ռուսաստանի վրա հարձակվելու համար: «Թուրքիայի կողմից Պարսկական տերիտորիայի դավթումը, իսկ գլխավորապես թուրքերի արտասովոր ռազմական նախապատրաստությունները ակամայից վտանգ է ներշնչում անակնկալի շգալ²⁰. մասնակի մոբիլիզացիա էրզրումի, Վանի շրջանում գտնվող զորամասերը լրիվ համալրելու և ուժեղացնելու համար, ինչպես նաև թուրքական 6-րդ կորպուսին տրված հրամանը Ռուսաստանի դեմ հարձակման անցնելու պատրաստակամության մասին հիմք էին տալիս Վորոնցով-Դաշկովին եզրակացնելու, որ եթե կտրուկ միջոցների չզիմել կովկասյան բանակն ուժեղացնելու ուղղությամբ, ապա կարող է կրկնվել Հեռավոր Արևելքում 1904—1905 թթ. տեղի ունեցած ողբերգությունը²¹:

Խոսելով այն մասին, որ Մինիստրների խորհուրդը մտադիր է ցարից պահանջել զինված միջամտությամբ վերջ տալու Պարսկաստանում ծավալված հեղափոխական շարժումներին ու խռովություններին, Վորոնցով-Դաշկովը ցուցաբերում է տակտ ու հեռատեսություն, խորհուրդ տալով Նիկոլայ II-ին չզիմել նման քայլի: «Զեմ կարող ամենավճռական կերպով դեմ շարտահայտվել նման միջամտության, որն անկասկած կտանի դեպի իրադրության ամեն տեսակի բարդացում՝ տվյալ դեպքում խիստ անձեռնադու Ռուսաստանի և հատկապես Կովկասի համար»²²:

Խռովություններն ու անկարգությունները Պարսկաստանում, ըստ Վորոնցով-Դաշկովի, Ռուսաստանի համար չեն կարող որևէ վտանգ ներկայացնել, ուստի գլխավոր ուշադրությունը պետք է դարձնել Թուրքիայի վրա, ուր ակտիվորեն գործում են նաև գերմանացիները²³:

Տալով ապագա կովկասյան ճակատի ու թիկունքի բարդությունների պատկերը՝ կապված տեղանքի, կլիմայի, ճանապարհների սակավության, ազգային

²⁰ ЦГВИА СССР, ф. 601, оп. 1, д. 1210, Л-20 կամ «Красный Архив», т. 1 (XXV), 1928 г., стр. 105.

²¹ Նույն տեղում, թ. 21:

²² Նույն տեղում,

²³ Նույն տեղում, թ. 22:

հարաբերությունների հետ, նա ամենից առաջ խնդիր է դնում ուժեղացնել ռազմական օկրուգը: Այդ զեկուցագրից պարզվում է, որ կովկասյան բանակն ուներ առհասարակ հետևյալ պակասավոր կողմերն ու բացերը. քիչ էին բերդային, լեռնային և դաշտային հրանոթների թիվը և նրանց արկերը: Պակասում էին հեծյալ զորամասերը, պահեստներում խիստ անբավարար էին հրազենի և փամփուշտների ռեզերվները, համարյա բացակայում էին պահեստի մասերը ինչպես հրետանու, նույնպես և հրաձգային զենքի ասպարեզում, համարյա իսպառ բացակայում էին կապի և ինժեներական զորքերի համար անհրաժեշտ միջոցները, սանիտարական ծառայության գծով զորքերը գտնվում էին անմխիթար վիճակում:

Այս և նման կարգի լուրջ թերությունները կարճ ժամանակամիջոցում լիկվիդացնելու համար Վորոնցով-Դաշկովը խնդիր է դնում անհապաղ «ուժեղացնել Կովկասի բանակը Ռուսաստանի ներքին օկրուգների հաշվին, արագացնելու հրետանու վերազինումը նոր տեսակներով, հատկապես լեռնային հրանոթներով, համալրել պահեստներում եղած պակասները և բերդերի մարտունակությունը բարձրացնել ժամանակի պահանջներին համապատասխան: Միայն այդպիսի պայմանով Թուրքիայի նախապատրաստությունները վտանգավոր չեն լինի, և անխուսափելի, անհրաժեշտության դեպքում կովկասյան զորքերը պատվով կպաշտպանեն Ռուսաստանի արժանապատվությունը և իրենց հին մարտական տրադիցիաները»²⁴:

Չանցած մի քանի ամիս, Վորոնցով-Դաշկովը մի այլ զեկուցագրում նկարագրելով իրերի դրությունը, համառորեն խնդրում է ցարից՝ հոգալ կովկասյան բանակի կարիքները, տրամադրելով անհրաժեշտ միջոցներ (մոտ 6 միլիոն ռուբլի) Կարսի երկաթգծի կառուցման և այլ միջոցառումների համար: Նա սպառնում է, որ եթե այժմ 6 միլիոն չծախսվի, հետագայում թուրքերի հարձակման դեպքում 6 միլիարդով հնարավոր չի լինի փրկել դրությունը:

Արդեն 1909 թ. Վորոնցով-Դաշկովը իր զոհունակությունն է արտահայտում ցարին նրա ցույց տված օգնության համար:

Հայտնի է այն անբարյացակամ վերաբերմունքը, որ ունեին Ստոլիպինը, ռազմական մինիստր գեներալ Սուխոմլինովը և գերագույն շտաբի պետ գեներալ Յանուշևիչը դեպի Վորոնցով-Դաշկովը: Ջգալով նրանց կողմից հորինված արգելքները կովկասյան բանակի կարիքները բարելավելու հարցում, Վորոնցով-Դաշկովը նորից ցարին խորհուրդ է տալիս՝ եթե փոխարքան լավը չէ, կարելի է նրան փոխել, իսկ Կովկասի մասին, որպես Ռուսաստանի համար կենսական նշանակություն ունեցող երկրամասի, անպատճառ պետք է հոգալ ինչպես հարկն է՝²⁵:

1912 թ. հոկտեմբերի 9-ին Նիկոլայ II-ին գրած զեկուցագրից պարզվում է, որ մինիստրների կաբինետի նախագահին կից խորհրդակցությունը հատուկ քննության է ենթարկել Վորոնցով-Դաշկովի միջնորդությունները կովկասյան բանակի ուժեղացման մասին: «Չնայած ձեռք բերած արդյունքները, — գրում է փոխարքան, — չեն համապատասխանում իմ առաջարկած չափերին, այնուամենայնիվ խորհրդակցությունը հանգեց այն եզրակացության, որ կովկասյան զորքերի քանակն ավելացվի մեկ նոր կազմակերպվող կորպուսով և ուժեղացվի»:

²⁴ «Красный Архив», том I (XXVI), 1928 г., стр. 112.

²⁵ Նույն տեղում, էջ 112:

գոյություն ունեցող 3 կորպուսների կազմը²⁶։ Այդ հաջողության համար Վորոնցով-Դաշկովը հատուկ շնորհակալություն է հայտնում ցարին։

Հաշվի առնելով, որ գերագույն շտաբի պլանի համաձայն ենթադրվում էր Թուրքիայի շեղոթությունը համաեվրոպական պատերազմի դեպքում և կովկասյան բանակի 3 կորպուսներից 2-ի փոխադրումն արևմտյան ռազմաճակատ, Վորոնցով-Դաշկովը բազմիցս բողոքել է Պետերբուրգ նման ոչ ռեալիստական մոտեցման դեմ։ Նա երբեք չէր հավատում Թուրքիայի ղեկավար գործիչների կեղծ հայտարարություններին, ուստի առաջարկում էր կովկասյան բանակը ոչ թե պակասեցնել, այլ ուժեղացնել, որին նա հասավ շատ մեծ դժվարությամբ։ Երբ 1914 թ. ուշ աշնանը սկսվեցին պատերազմական գործողությունները Թուրքիայի և Ռուսաստանի միջև, չնայած երկու կորպուսներն արդեն փոխադրված էին արևմտյան ճակատ, այնուամենայնիվ նրանց փոխարեն կովկասյան ճակատ փոխադրվեցին Թուրքեստանյան 2-րդ կորպուսը և մի շարք այլ զորամասեր։

Պատերազմից առաջ կովկասյան բանակի հրամանատարության միջոցառումները իրանական Ադրբեջանում, որի հետևանքով կանխվեց Թուրքերի թևային հարձակումը Անդրկովկասի վրա, նույնպես մտածված ու իրենց արդարացնող միջոցառումներ էին։

Մենք կանգ առանք առաջին համաշխարհային պատերազմի նախօրյակին Մերձավոր արևելքում ցարիզմի վարած քաղաքականության ընդհանուր ոգուն համասլատասխան կովկասի փոխարքա Վորոնցով-Դաշկովի գործունեության վրա միայն երկու հարցում, որոնք, ըստ մեզ, որոշակի պատմա-գիտական հետաքրքրություն են ներկայացնում առաջին համաշխարհային պատերազմի կովկասյան ճակատի ռազմական գործողությունների ընթացքը ըմբռնելու համար։

²⁶ Նույն տեղում, էջ 117. Հենց նույն նամակում էլ նա նորից նշում է, որ իրեն ձանձրացրել են Պետրոգրադի որոշ մինիստրների անվերջ դավերն ու շարակամությունները։